

Ex-minister Paul Croes a bolbe hospital



Diahuebs a bira conoci cu ex-minister Paul Croes a bira malo den detencion y a keda transporta pa hospital, pero despues di haci chekeo a bay back den detencion. Sinembargo, noticieronan local ayera a reporta cu Croes mester a bolbe hospital.

No ta conoci kico ta e problema di salud di e ex-mandatario. Sinembargo, riba

rednan social informacion ta indica cu el a keda interna den hospital pa haci test y a keda bao observacion. No ta conoci cuanto dia e lo mester permanece den hospital.

Croes ta sirbiendo un castigo di 36 luna di prison pa entre otro labamento di placa y dirigi un organizacion criminal for di Cocolishi, en conexion cu caso Ibis.

Glenbert Croes ta acusa di soborno y mal uso di su funcion

Ayera mainta a bira conoci e noticia di suspension di detencion di ex-minister Glenbert Croes ken ta acusa di soborno y mal uso di su funcion y ademas el a logra sali for di hospital debi cu su situacion di salud a complica mientras e tabata den warda di polis.

Den un declaracion cortico cu abogadonan di e ex-mandatario, Demis Illes y Vito Carlo a manda na redactor di Bon Dia Aruba a señala lo siguiente:

“Pa medio di e declaracion aki, team di defensa di Sr. Glenbert Croes ta confirma cu awe mainta 11:00am e suspension di su detencion a drenta na vigor. Tanto e team di defensa como Ministerio Publico a solicita e suspension di su detencion. Hues comisario a honra e peticion aki bao algun condicion. Croes a confirma cu lo cumpli cu e condicionnan stipula pa hues comisario. Por lo demas, a peticion di Croes, ta confirma cu su persona, despues di a retira como minister manera ley ta stipula, alabes lo retira y tuma distancia di politica. Pa awor Croes kier concentra riba su



salud y su famia.”

Pa loke ta trata e caso mes, por divulga cu ta trata dos cargo/acusacion: Soborno y mal uso di funcion.

“Croes ta confirma su inocencia contra e dos sospecho den su contra y lo bay dedica tempo na su defensa pa comprueba esaki,” e comunicado ta señala.

Croes a ser deteni dia 7 di october ultimo pa ta sospechoso den e caso Portulaca y a ser hiba te Mariniers Kazerne, algo cu su mesun abogadonan no ta compronde e motibo di esaki, segun a sigura.

Di otro banda, oficina di su Excelencia Sr. Gobernador Alfonso Boekhoudt a sigura cu “Gobernador a tuma e de-

cision awe pa retira señor G.F. Croes for di su funcion di minister. E decision pa retira minister Croes a wordo tuma despues cu el a pidi esaki di acuerdo cu articulo 17, sub b, di e Ordenansa Nacional pa Integridad di Ministernan.”

Reaccionando riba e carta cu Gobernador a manda dia 9 di october 2024 pa Presidente di Parlamento, den cua a pidi – segun Constitucion ta prescribi – opinion di Parlamento, Parlamento a bay di acuerdo cu e retiro di minister Croes. Gobernador a dicidi tambe di encarga señor R.G. Tjon, minister di Husticia y Asuntonan Social cu e maneho y responsabilidad di e ministerio di Labor, Energia y Integracion.

Orario di entrega di lista di candidatonan di partidonan pa proximo eleccion a bira conoci



Ayera, medionan di comunicacion local a haya e informacion di e orario cu partidonan politico ta bay entrega nan lista di candidatonan cu lo participa pa eleccion di dia 6 di december.

Den cuadro di entrega di lista di candidatonan di partidonan politico dia 18 di october 2024, e partidonan cu ta desea di entrega nan lista di

candidato personalmente, a haya e oportunidad ayera pa saca un lot pa asina stipula e orario di entrega di e lista di candidatonan di partidonan politico pa cu e eleccion di parlamento di 6 december 2024.

Un total di 10 partido politico tabata presente pa e loting. E resultado di e loting ta segun e tabel adhunto.

PARTIDO	ORARIO
HTC	9:00 AM
	9:30 AM
Cristiannan Uni Reforzando Potencial di Aruba (CURPA)	10:00 AM
Movimiento Arubano Soberano (MAS)	10:30 AM
Movimiento Indigena Arubano (MIA)	11:00 AM
	11:30 AM
Partido Patriotico di Aruba (PPA)	12:00 PM
	12:30 PM
RAIZ	01:00 PM
Movimiento Electoral di Pueblo (MEP)	01:30 PM
	02:00 PM
Red Democratico (RED)	02:30 PM
Accion 21 (ACCION 21)	03:00 PM
FUTURO (FUTURO)	03:30 PM